

Ո Ր Ո Շ ՈՒ Մ N 51
Վարչական վարույթը կարճելու մասին

«17» փետրվարի 2023թ

ք. Սիսիան

Ես՝ Հայաստանի Հանրապետության պետական եկամուտների կոմիտեի Հարավային մաքսատուն-վարչության պետ Արտաշես Ղամբարյանս, քննելով Ղազախստանի քաղաքացի Քուատ Աբիլմաջանովի (անձնագիր՝ N09599962) կողմից մաքսային կանոնների խախտում կատարելու վերաբերյալ նյութերը,

Պ Ա Ր Զ Ե Ց Ի

Թիվ 05100041/130123/0001570 տարանցման հայտարարագրով ՀՀ ներմուծված NISSAN PATHFINDER մակնիշի, 5N1AR2MN6DC624767 նույնականացման համարով, 2013 թվականի արտադրության տրանսպորտային միջոցը սահմանված ժամկետում մինչև 23.01.2023 թվականը ներառյալ չի հասցվել նշանակման մաքսային մարմին՝ Բագրատաշենի մաքսային կետ-բաժին:

Նշված փաստի առթիվ քաղաքացի Քուատ Աբիլմաջանովի նկատմամբ Հայաստանի Հանրապետության պետական եկամուտների կոմիտեի Հարավային մաքսատուն-վարչության ավագ մաքսային տեսուչ-իրավաբանի կողմից 26.02.2023 թվականին հարուցվել է մաքսային կանոնների խախտման վերաբերյալ վարույթ՝ Մաքսային կարգավորման մասին ՀՀ օրենքի 305-րդ հոդվածի հատկանիշներով, այն է՝ մաքսային հսկողության ներքո փոխադրվող ապրանքները կամ տրանսպորտային միջոցները կամ դրանք ուղեկցող փաստաթղթերը մաքսային մարմին չհասցնելը, մաքսային մարմնի սահմանած մաքսային տարանցման ժամկետը կամ տարանցման երթուղին չպահպանելը կամ ապրանքները կամ տրանսպորտային միջոցները մաքսային մարմնի սահմանած առաքման վայրից տարբերվող այլ վայր հասցնելը:

Վարչական վարույթի շրջանակներում, հարցում է կատարվել Ներքին անվտանգության վարչությանը՝ քաղաքացի Քուատ Աբիլմաջանովի սահմանահատումների պատմությունը ստանալու նպատակով:

Ներքին անվտանգության վարչությունից ստացված տեղեկատվության համաձայն քաղաքացի Քուատ Աբիլմաջանովը 15.01.2023 թվականին ժամը 23:14-ին Բագրատաշեն

պետական սահմանի անցման կետով NISSAN PATHFINDER մակնիշի, 5N1AR2MN6DC624767 նույնականացման համարով, 2013 թվականի արտադրության տրանսպորտային միջոցով անցել է Վրաստան:

Վերոգրյալից պարզ է դառնում, որ NISSAN PATHFINDER մակնիշի, 5N1AR2MN6DC624767 նույնականացման համարով, 2013 թվականի արտադրության տրանսպորտային միջոցը սահմանված ժամկետում փաստացի հասցվել է Բազրատաշենի մաքսային կետ-բաժին:

ԵՏՄ մաքսային օրենսգրքի 150-րդ հոդվածի 1-ին մասի 1-ին կետի համաձայն՝ «մաքսային տարանցում» մաքսային ընթացակարգին համապատասխան ապրանքների փոխադրման (տրանսպորտային փոխադրման) ժամանակ փոխադրողը, անկախ այդ մաքսային ընթացակարգով ձևակերպված ապրանքների հայտարարատուն լինելու հանգամանքից, պարտավոր է.

1. ուղարկող մաքսային մարմնի կողմից սահմանված ժամկետում ապրանքներն ու դրանց փաստաթղթերը հասցնել ապրանքների առաքման վայր՝ հետևելով ապրանքների փոխադրման (տրանսպորտային փոխադրման) սահմանված երթուղուն, եթե այդպիսին սահմանված է:

Մաքսային կարգավորման մասին ՀՀ օրենքի 301-րդ հոդվածի համաձայն՝ մաքսային կանոնների խախտում է համարվում անձի կատարած անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության պետական սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

«Վարչարարության հիմունքների և վարչական վարույթի մասին» ՀՀ օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

Նույն օրենքի 42-րդ հոդվածի 1-ին մասի համաձայն՝ վարչական մարմինը վարչական վարույթում որպես ապացույց գնահատում է գործում առկա բացատրությունները, ցուցմունքները, փորձագիտական եզրակացությունները, փաստաթղթերը, նյութերը, իրերը, ինչպես նաև այն հանգամանքները, որոնք իր հայեցողությամբ այդ մարմինը պիտանի և անհրաժեշտ է համարում գործի փաստական հանգամանքների բացահայտման և գնահատման համար:

«Վարչական իրավախախտումների վերաբերյալ» ՀՀ օրենսգրքի 247-րդ հոդվածի համաձայն՝ Վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման հետևյալ հանգամանքների առկայության դեպքում՝ 1) վարչական իրավախախտման դեպքի կամ կազմի բացակայությունը(...):

«Վարչական իրավախախտումների վերաբերյալ» ՀՀ օրենսգրքի 279-րդ հոդվածի համաձայն՝ վարչական իրավախախտման վերաբերյալ գործը քննելիս մարմինը (պաշտոնատար անձը) պարտավոր է պարզել՝ կատարվել է արդյոք վարչական իրավախախտում, արդյոք, տվյալ անձը մեղավոր է այն կատարելու մեջ, արդյոք նա ենթակա է վարչական պատասխանատվության:

Վերոշարադրյալ նորմերի համադրված վերլուծությունից ակնհայտ է, որ օրենսդիրը, «Վարչական իրավախախտումների վերաբերյալ» ՀՀ օրենսգրքի ընդհանուր մասում սահմանելով վարչական իրավախախտման, այն կատարելու համար նախատեսված վարչական պատասխանատվության, վարչական տույժի և դրա նպատակների հասկացությունները, ինչպես նաև տույժ նշանակելու ընդհանուր կանոնները, որպես վարչական պատասխանատվության ընդհանուր սկզբունքներ ամրագրել է «անձնական պատասխանատվության» և «պատասխանատվությունը մեղքի համար» սկզբունքները: Նշված սկզբունքների էության շուրջ իր դիրքորոշումն է հայտնել նաև ՀՀ Սահմանադրական դատարանն իր 2014 թվականի հունիսի 3-ի թիվ ՍԴՈ-1153 որոշման մեջ հետևյալ հիմնավորումներով. «Վարչական իրավախախտումների վերաբերյալ ՀՀ օրենսգրքի 9-րդ, 32-րդ և 279-րդ հոդվածների համադրված ուսումնասիրությունը վկայում է, որ վարչական պատասխանատվության սկզբունքներից է «պատասխանատվությունը մեղքի համար» սկզբունքը, ինչը նշանակում է, որ վարչական տույժը (պատասխանատվությունը) կարող է կիրառվել միայն վարչական իրավախախտում կատարելու մեջ մեղավոր անձի նկատմամբ:

Հետևաբար՝ մեղքը, որպես վարչական զանցակազմի սուբյեկտիվ կողմի պարտադիր տարր, հանդիսանում է վարչական պատասխանատվության իրավական միակ նախապայմանն ու նախադրյալը:

Վարչական մարմինը գնահատելով գործում եղած բոլոր ապացույցները, բազմակողմանի և օբյեկտիվ հետազոտման վրա հիմնված ներքին համոզմամբ գտնում է, որ այս վարչական գործով բացակայում է Ղազախստանի քաղաքացի Քուատ Աբիլմաջանովի մեղքը և վարչական վարույթը ենթակա է կարճման:


Ելնելով վերոգրյալից և ղեկավարվելով «Վարչական իրավախախտումների վերաբերյալ» ՀՀ օրենսգրքի 247-րդ հոդվածի 1-ին մասով և Մաքսային կարգավորման մասին ՀՀ օրենքի 334-րդ հոդվածի 1-ին մասի 2-րդ կետով,

Ո Ր Ո Շ Ե Ց Ի

1. Ղազախստանի քաղաքացի Քուատ Աբիլմաջանովին նկատմամբ Մաքսային կարգավորման մասին ՀՀ օրենքի 305-րդ հոդվածով սահմանված մաքսային կանոնների խախտում կատարելու համար հարուցված վարչական վարույթը կարճել:

2. Որոշման մասին հայտնել քաղաքացի Քուատ Աբիլմաջանովին:

ՀԱՐԱՎԱՅԻՆ ՄԱՔՍԱՏՈՒՆ-ՎԱՐՉՈՒԹՅԱՆ ՊԵՏ
ՄԾ ԳՆԴԱՊԵՏ



ԱՐՏԱՇԵՍ ՂԱՄԲԱՐՅԱՆ